



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 703/5 Prot

Tiranë, më 01/10/2015

V E N D I M

Nr. 41, datë 01/10/2015

Në mbështetje të neneve 29, 30 dhe 32 të Ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar, Ligjit nr. 8485, datë 12.05.1999 "Kodi i Procedurave Administrative të Republikës së Shqipërisë", të procesverbalit të hetimit administrativ dhe provave të administruara në ngarkim të kontrolluesit, *Gazmend Beta P.F "Bar Oslo"*.

V Ë R E J S E :

Në zbatim të Urdhrit nr. 173, datë 04/09/2015 është kryer hetim administrativ pranë subjektit kontrollues *Gazmend Beta P.F "Bar Oslo"* me objekt:

- Plotësimi i detyrimit për informim, (Neni 18) i Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar dhe zbatimi i Udhëzimit nr. 3, datë 05/03/2010 "Mbi përpunimin e të dhënave personale me sistemin e video survejimit në ndërtesa dhe mjedise të tjera" i ndryshuar;
- Plotësimi i detyrimit për njoftim, (Nenet 21, 22) të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar;

Në kuadër të zbatimit të plotësimit të detyrimit për informim, (Neni 18) i Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar dhe Udhëzimit nr. 3, datë 05/03/2010 "Mbi përpunimin e të dhënave personale me sistemin e video survejimit në ndërtesa dhe mjedise të tjera" i ndryshuar, Kontrolluesi *Gazmend Beta P.F "Bar Oslo"* mbledh dhe për këtë arsye përpunon të dhëna imazhe dhe video të subjekteve të të dhënave punonjës dhe klientë, nëpërmjet sistemit të video-survejitimit (CCTV).

Gjatë kryerjes së hetimit administrativ rezultoi se kontrolluesi nuk ka hartuar rregulla mbi administrimin e sistemit CCTV, nuk ka marrë masat e sigurisë fizike dhe teknike lidhur me sigurinë e të dhënave personale të përpunuara nëpërmjet sistemit të video-survejitimit, ka vendosur tabela informuese për kamerat por jo sipas modelit të parashikuar në Udhëzimin e mësipërm, nuk ka marrë masa në lidhje me informimin e subjektit të të dhënave mbi mundësinë e ushtrimit të të drejtave të tyre të sanksionuara në ligjin nr. 9887, datë 10.03.2008 "Për mbrojtjen e të dhënave personale", i ndryshuar, dhe nuk i jep mundësinë për të kontaktuar me kontrolluesin në rast ankesash.

Në lidhje me plotësimin e detyrimit për njoftim, kontrolluesi, gjatë ushtrimit të aktivitetit mbledh, përpunon, ruan të dhëna personale për subjektet e të dhënave të cilët kanë lidhje me

aktivitetin e tij. Nga verifikimi i kryer në regjistrin elektronik të KDIMDP-së dhe në protokollin e Zyrës së Komisionerit, u konstatua se ky subjekt nuk e ka përmbushur detyrimin për njoftim në zbatim të nenit 21 të ligjit.

Për shkeljet e konstatuara është mbajtur procesverbali i konstatimit, si dhe në respektim të së drejtës për t'u dëgjuar, në zbatim të neneve 93-96 të ligjit nr. 8485, datë 12.05.1999 "*Kodi i Procedurave Administrative të Republikës së Shqipërisë*", në datë 23/09/2015 është organizuar seanca dëgjimore me përfaqësuesit e kontrolluesit lidhur me konstatimet e grupit të kontrollit administrativ, përpara marrjes së vendimit përfundimtar.

Në këtë seancë dëgjimore përfaqësuesi i subjektit kontrollues *Gazmend Beta P.F "Bar Oslo"* deklaroi se: "*Ky subjekt ka qënë në emër të Z.Gazmend Beta. Për rregulloren nuk ka qënë në dijeni, formulari është dorëzuar në datë 09.09.2015. Gjithashtu, kemi përpiluar dhe rregulloren*".

Subjekti kontrollues *Gazmend Beta P.F "Bar Oslo"* sipas ekstraktit të Qendrës Kombëtare të Regjistrimit është krijuar dhe ushtron aktivitetin e tij që prej datës 11.03.2014, që nga kjo datë ka patur gjithë mundësinë për t'u njohur me ligjin dhe detyrimet e tij.

Në paragrafin 1, të nenit 21, të ligjit të sipërcituar, parashikohet: "*...Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji*".

Gjithashtu, bazuar në nenin 25/1 të ligjit të sipërcituar, parashikohet që kontrolluesi nuk mund të fillojë përpunimin e të dhënave personale pa njoftuar më parë zyrën e Komisionerit. Kontrolluesi nuk duhet të fillonte përpunimin e të dhënave personale pa njoftuar Zyrën e Komisionerit. Shkelja e konstatuar, lidhet me të drejtën e subjekteve të të dhënave personale për t'u informuar se kush përpunon të dhëna personale, cilat janë të dhënat që përpunohen, informimin si një e drejtë parësore në zbatim të ligjit dhe parim bazë i mbrojtjes së të dhënave personale.

Në këto kushte, konsiderohen shkelje serioze si përpunimi i të dhënave personale pa njoftuar dhe pa u regjistruar më parë, në Regjistrin Qëndror të subjekteve kontrolluese, të administruar nga Zyra e Komisionerit dhe mungesa e tabelave informuese sipas formatit të duhur pasi nuk e informojnë subjektin e të dhënave mbi mundësinë e ushtrimit të të drejtave të tyre të sanksionuara në ligjin nr. 9887, datë 10.03.2008 "*Për Mbrojtjen e të Dhënave Personale*", i ndryshuar.

Si përfundim, shkeljet e konstatuara gjatë ushtrimit të kontrollit administrativ në kuptim të nenit 39/1 shkronjat "b" dhe "d" të Ligjit nr. 9887 datë 10/03/2008 "*Për Mbrojtjen e të Dhënave Personale*" i ndryshuar, përbën kundërvajtje administrative dhe sanksionohet me gjobë, si më poshtë:

- Kontrolluesit, që nuk përmbushin detyrimin për të informuar, të përcaktuar në nenin 18 të këtij ligji, dënohen me 10 000 deri në 300 000 lekë;
- Kontrolluesit, që nuk përmbushin detyrimin për të njoftuar, sipas përcaktimit në nenin 21 të këtij ligji, dënohen me gjobë në vlerën 10 000 deri në 500 000 lekë.

Për zgjedhjen e masës së gjobës, Zyra e Komisionerit ka parasysh faktin se shkelja e konstatuar është serioze, ajo lidhet me të drejtën e subjekteve të të dhënave personale për t'u informuar se kush përpunon të dhëna personale, informimin si një e drejtë parësore në zbatim të ligjit dhe parim bazë i mbrojtjes së të dhënave personale. Gjithashtu, bazohet në bashkëpunimin gjatë ushtrimit të hetimit administrativ si edhe reagimin e kontrolluesit për shkeljet e konstatuara.

PËR KËTO ARSYE :

Në zbatim të neneve 18, 21, 30, 31, 32/1, 39/1/d, 40 dhe 41 të Ligjit nr. 9887, datë 10.03.2008 "*Për Mbrojtjen e të Dhënave Personale*" i ndryshuar,

V E N D O S A :

1. Dënimin e kontrolluesit "*Gazmend Beta*" P.F me gjobë, në vlerën **20 000 (njëzetë mijë) lekë** për shkelje të detyrimit të përcaktuar në nenin 21 të Ligjit Nr. 9887, datë 10.03.2008 "*Për Mbrojtjen e të Dhënave Personale*" i ndryshuar.
2. Në zbatim të nenit 18 të Ligjit nr. 9887, datë 10.03.2008 "*Për Mbrojtjen e të Dhënave Personale*", i ndryshuar, kontrolluesi "*Gazmend Beta*" P.F duhet të marrë masat për sigurinë fizike dhe teknike të sistemit, të realizohet informimi i subjekteve të të dhënave personale duke vendosur tabela informuese për kamerat sipas modelit të parashikuar në Udhëzimin nr. 3, datë 05/03/2010 "*Mbi përpunimin e të dhënave personale me sistemin e video survejimit në ndërtesa dhe mjedise të tjera*" i ndryshuar;
3. Në zbatim të nenit 32/1 të Ligjit nr. 9887, datë 10.03.2008 "*Për Mbrojtjen e të Dhënave Personale*", i ndryshuar, të kryhet plotësimi i detyrimit të pikës 2 brenda një afati 5 ditor, nga momenti i marrjes dijeni dhe pas këtij afati të njoftohet me shkrim pranë Komisionerit për të Drejtën e Informimit dhe Mbrojtjen e të Dhënave Personale.
4. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e këtij afati, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
5. Kundër këtij vendimi mund të bëhet ankim në gjykatën administrative kompetente, në afatet dhe sipas procedurave që rregullojnë gjykimin administrativ, në përputhje me nenin 40 të ligjit nr. 9887, datë 10.03.2008 "*Për Mbrojtjen e të Dhënave Personale*" i ndryshuar.

Ky vendim u shpall sot në. 01 / 10 / 2015

